

Date – 02/05/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Chief Minister Pu Lalduhoma'n HPC-D (LF) ten ralthuam an tun tak avangin Mizoram chu hel awm lohna state a ni a ti.
2. Ramchhunga state hrang hrang Goods and Services Tax dinhmun tarlanah Mizoram GST chu nikum 2025 April thla chhunga khawn aain za zela 17 in a tlahniam.
3. Election Commission chuan vawiinah West Bengal-ah Polling Station 15 ah vote thlak tha turin a hriattir
4. Narcotics Control Bureau (NCB) te chuan nimin khan Mumbaiah Cocaine tha chi kg 349, cheng vaibelchhe 1745 man an man.



CHIEF MINISTER

Chief Minister Pu Lalduhoma'n HPC-D (LF) ten ralthuam an tun tak avangin Mizoram chu hel awm lohna state a ni a ti.

Thenzawl Auditorium-a Serchhip Sub-Headquarters YMA Inkhawmpui a hmanpui na ah he thu hi sawiin Chief Minister chuan HPC-D (LF) ten ralthuam an tun tak avangin Mizoram chu hnam pual hel pawl an awm tawh loh thu a sawi a, heng hi YMA-te thawhrah a nih thu sawiin Manipur leh Chin Hills lamah Mizo nihna chungchangah harhtharna a thleng mek tih a sawi.

Pu Lalduhoma chuan Serchhip bialah kawng hrang hranga hmasawna tur hnathawh mek ani a ti a, Thenzawl thleng Rel a luh theih nana hmalakna kalpui mek ani tih sawiin Thenzawl chu Peace City project pawh kalpui mek ani tiin Aizawl leh Thenzawl inkar chu National Highway kaltlang tir tum anih thu a sawi.

Chief Minister chuan thalaite chu chhungril nun siam tha a, ruihhlo laka fihlim tur leh ram dang officer-te el pha tura National level competitive exam-te hmachhawn tam turin a fuih a, hlawhtlinna chang ngei thei turin taihmakna leh tumruhna nei turin a fuih bawk.



CM : DISASTER RELIEF

Chief Minister chuan a bial chhung Serchhip Constituency-a Thlipui leh ruah sur nasa avanga chhiat tawkte hnenah zangnadawmna a hlan.

Pu Lalduhoma chuan Thenzawl khawchhunga thlipui leh ruahpui avanga chhiat tawkte hnenah SDRF leh CM Relief Fund atangin zangnadawmna a hlan a, Thenzawl Kanan veng leh Tualvungi veng a chhiat tawkte chu a hmunah a tlawh nghal bawk.

April ni 27, thawhtanni tlaia thlipui leh ruahpui sur khan Thenzawl-a chenna in 8 chu luah tlak lohvin a len chhia a, heng bakah hian in chhe nasa zual 9 awmin, chhe nasa lutuk lo 54, sawrkar in leh vantlang in chhia 13 leh electric ban tlu 15 a awm a ni.

Disaster Management & Rehabilitation department sawi danin April ni 27 atanga ni 3 chhung vel ruah leh thlipui thawk khan Mizoram pumah chenna in 175 aia tlem lo leh sorkar, kohhran leh vantlang in 20 dawn lai a tichhia a ni.



GST

Ramchhunga state hrang hrang Goods and Services Tax dinhmun tarlanah Mizoram GST chu nikum 2025 April thla chhunga khawn aiin za zela 17 in a tlahniam.

Ministry of Finance tarlan danin India ram chhiah khawmna atan July 2017 atangin GST hman anih hnuah rampum huapa GST khawn chu a pun belh zel a, nikum 2025 April thlaa GST nena khaikhinin a punna chu za zela 8.7 a ni a, India ramin kumin 2026 April thla chhunga GST chhiah a khawn zat chu cheng vbch nuai 2 chuang niin Nikum April 2025 thla khawn zat cheng vaibelchhe nuai 2 sing 3 sang 2265 aia a punna chu za zela 8.7% a ni.

Ministry of Finance tarlan danin nikum September 22 atangin Goods and Service Tax (GST) chhiah thil chi hrang 375 ah tih hniam a ni a. In chhung bungrua leh khawsak relna chi hrang hrang atanga motor lam chi thlenga GST rate hi tih hniam leh thil thenkhat phei chu chhiah lak lohna rate 0% a tih hniam a ni.

April 2026 chhunga Mizoram khawn zat vaibelchhe 37 a ni a, thla hmasa March 2026 khawn zat cheng vaibelchhe 33 aiin a pung a, Nikum April 2025 thla chhung khawn zat cheng vaibelchhe 45 aia a kiamna hi 17% a ni tih Union Finance Ministry thu chhuah chuan a tar lang a ni.



PHAWNGPUI NATIONAL PARK

Phawngpui National Park chu Forest Department ten Nungcha inthlahpun hun a nih dawn avangin nimin May ni 1 atanga kumin October ni 31 thleng Phawngpui National Park chu khar a ni tih an sawi.

Chhimpui Wildlife Division-a Dy. Conservator of Forest-in hriattirna an tihchhuaha tarlan a nih danin, fupui lo thleng tur leh National Park chhunga nungcha chi hrang hrangte inthlahpun hun a lo inher chhuak leh tan avangin Nungchate ralmuang leh him taka an awm theih nan leh nungcha leh ramngawte anmahni a an insiamthat theih nan Phawngpui National Park chu May ni 1 atanga October ni 31 thleng khar a ni.

Hemi hun chhung hian mipuitan Phawngpui National Park chu tlawh theih a ni lo va, ramsa leh nungcha humhalh kawnga Department hmalakna chu tawiawm turin mipuite ngen an ni.

<><><>

ANIMAL INSURANCE

Ran vulhtuten an ran vulhte an thih palh pawha sum an hmuh theihna tura Mizoram sorkarin National Insurance Company (NIC) thawhpuaia 'Animal Insurance' a kalpui mekah nimin thleng khan vawk 667 insurance tih a ni tawh a, ran dang - bawng, sial, beram leh kel vulhtu zingah insurance ti an la awm lo.

NIC hotute hnen atanga Akashvani News Aizawl thudawn danin, Aizawl district-ah vawk insurance tihsak 371 awm tawhin a tam ber a; Siaha, Serchhip leh Saitual district-ah insurance ti an la awm lo a ni.

Insurance tih man hi a tira sorkar nena inremnaah chuan GST chawi ngai tura ngaih a nih avangin GST chhût tel a ni a, amaherawhchu central scheme-ah GST chawi a lo ngaih leh si loh avangin ran insurance tih man hi a tlawm ta zawk niin NIC hotute chuan an sawi a, vawkah pawh a tirah insurance tihna man tur hi GST chhût telin vawk pakhatat Rs 292 an chawi tur angin puan a ni a, MoU-ah pawh ziah lan a ni. Mahse, central scheme-ah GST chawi a lo ngaih leh si loh avangin vawk vulhtute hian Rs 248 chauh an chawi a ngai, an ti.

NIC hotute chuan ran insurance hi vawk bakah bawng, sial, beram leh kel-ahte tih theih ni mah se nimin thleng khan vawk vulhtute chiahin an vawk vulhte an insure thu an sawi a; vawk vulhtute zingah pawh hrileng a awm rih loh avanga insurance tih kher ngai ti lo engemaw zat an awm thu an sawi bawk.

<><><>

MUHCS

Mizoram sorkar chuan tun sorkar kum kal mek 2026-27 atana Mizoram Universal Healthcare Scheme (MUHCS) 2.0 a kalpui hnuah nimin thleng khan damlo 2,615 enkawlina senso atan cheng nuai 700 a pechhuak tawh.

Mizoram State Healthcare Society hotute chuan Akashvani News Aizawl zawhna chhangin, sorkar kum kal mekah MUHCS 2.0-ah hian MUHCS kalpuitu damdawi-inte hnenah damlo an enkawlna senso rulh nan cheng nuai 700 an pek chhuah tawh thu leh hei hi damlo 2,615 enkawlna senso a nih thu an sawi a; thla hmasa chhung khan damlo enkawlna pawisa hi tum 2 pekchhuah niin, kar hmasa khan cheng nuai 400 leh nimin khan cheng nuai 300 an pechhuak a ni.

Healthcare Society hotute chuan damlo bill an dawn reng thu leh a tahtawl tē tēin pawisa an pek chhuah zel thu an sawi a, damdawi-inite hnena damlo enkawlna senso pe turin an inbuatsaih leh mek thu leh karleh lamah pawh khian an pek chhuah leh dawn thu an sawi.

Tun dinhmunah MUHCS 2.0-ah hian nimin thleng khan pawisa senga inziaklut chhungkua 37,851 an awm tawh a. MUHCS 1.0 ah khan chhungkaw inziaklut 20,213 an awm a, a punna chu chhungkaw 17,638 niin za zela 87 point 26 zet a ni. Sorkarin April ni 28 khan MUHCS hmangtu damdawi-in te hnenah cheng vaibelchhe 3 leh nuai 99 chuang a pe chhuak a, Ningani khan cheng vaibelchhe 3 chuang a pe chhuak leh bawk.

MUHCS 2.0-ah hian inziahluh theih hun hi tun thla ni 15 thleng hawn niin, online hmangin muhcs.mizoram.gov.in ah inziahluh theih a ni a; sorkar hnathawkte, pensioner-te leh golden card neite chu inziahluh a ngai ve lo.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

REPOLL

Election Commission chuan vawiinah West Bengal-ah Polling Station 15 ah vote thlak tha turin a hriattir. Vote thlak thatna tur Polling Station 11 hi Magrahat Paschim Assembly bial chhung niin a dang pali hi Diamond Harbour Assembly bial chhung a ni a. Election Commission chuan Returning Officer leh Observer te zirchianna a enfiah hnuah vote thlak that hi a rel a. Tukin dar 7 atang khan vote thlak niin tlai dar 6 thleng hun hawn a ni ang.

<><><>

NCB

Narcotics Control Bureau (NCB) te chuan nimin khan ruihhlo tawlh tam tham tak manin Mumbaiah Cocaine tha chi kg 349, cheng vaibelchhe 1745 man an man.

Union Home Minister Amit Shah-a chuan Social media lamah he thu hi tarlangin sawrkar tan hlawhtlinna ropui tak anih thu a sawi a. Ruihhlo tawlhruk te thamte an chhui zui zelnaah hetiang a liantham hi an manchhuak a ti a. Sarwkarin ruihhlo tawlhru thin pawlte chu dim miahloin an chungah hma a la zel a ti baw.

<><><>